

萬有文庫

第二集七百種

王雲五主編

萬曆重修二百二十八卷本

明會典

(五十)

申時行等重修

商務印書館發行

萬曆重修二百二十八卷本

明會典

(五十)

申時行等重修

萬有文庫

第二集七百種

總編纂者
王雲五

商務印書館發行

明會典卷之六十一 禮部二十

【房屋器用等第】

國初著令。凡官民服色、冠帶、房舍、鞍馬、貴賤各有等第。上可以兼下。下不可以僭上。官員任滿。致仕與見任同。其父、祖有官身歿。非犯除名不叙子孫。許居父、祖房舍。及衣服、車馬有官者。依品級。其御賜者。及軍官、軍人服色。不在禁例。又禁凡服色、器皿、房屋等項。並不許雕刻刺繡古帝王、后妃、聖賢、人物故事。及日月、龍、鳳、獅子、麒麟、犀象等形。所以辨上下。定民志。至今遵守。不敢違越。其禁制備列于後。

凡房屋。洪武二十六年定。官員蓋造房屋。並不許歇山轉角。重簷重栱。繪畫藻井。其樓房不係重簷之例。聽從自便。○公、侯前廳七間。或五間。兩廡九架。造中堂七間。九架。後堂七間。七架。門屋三間。五架。門用金漆。及獸面擺錫環。家廟三間。五架。俱用黑板瓦蓋。屋脊用花樣瓦獸。梁棟、斗栱、簷椽。用綵色繪飾。窻枋柱用金漆。或黑油飾。其餘廊廡、庫廚從屋等房。從宜蓋造。俱不得過五間。七架。○一品、二品廳堂。五間。九架。屋脊許用瓦獸。梁棟、斗拱、簷椽。用青碧繪飾。門屋三間。五架。門用綠油。及獸面擺錫環。○三品、至五品廳堂。五間。七架。屋脊用瓦獸。梁棟、簷椽。用青碧繪飾。正門三間。三架。門用黑油擺錫環。○六品、至九品廳堂。三間。七架。梁棟止用土黃刷飾。正門一間。三架。黑門鐵環。○一品官房舍。除正廳外。其餘房舍許從宜蓋。

造比正屋制度務要減小不許太過其門窻戶牖並不許用硃紅油漆○庶民所居房舍不過三間五架不許用斗拱及綵色妝飾○又定在京功臣宅舍地勢寬者住宅後許畱空地十丈左右邊各許畱空地五丈若見住舊居所在地勢窄隘止仍舊居不許那移軍民以畱空地官員之家住宅照依前定丈尺不許多畱空地過此即便退出令子孫赴官告給園地另於城外量撥功臣之家不許於住宅前後左右多占地丈蓋造亭館或開掘池塘以爲游翫公侯內外文武四品以上官不得令子孫家人於市肆開張鋪店生放錢債及出外行商中鹽與販物貨○三十五年申明軍民房屋不許蓋造九五間數一品二品廳堂各七間六品至九品廳堂棟梁止用粉青刷飾庶民所居房屋從屋雖十所二十所隨所宜蓋但不得過三間○正統十二年令庶民房屋架多而間少者不在禁限

凡車輿洪武元年定並不得雕飾龍鳳紋職官一品至三品許用間金妝飾銀螭繡帶青幔四品至五品素獅頭繡帶青幔六品至九品用素雲頭素帶青幔轎子比同車製庶民車用黑油齊頭平頂皂幔轎子比同車製並不許用雲頭○六年令凡舟車坐轎除紅漆外許雜色漆飾五品以上車用青幔餘並不許其坐轎止許婦人及官民老疾者乘之○景泰四年令在京三品以上許乘轎其餘不許違例在外各衙門俱不許乘轎○弘治七年申明兩京及在外文武官員除奉有旨及文武例應乘轎者止許四人扛擡其兩京五府管事并內外鎮守守備等項公侯伯都督等官不分老少皆不許乘轎違例乘轎及擅用八

人者指實奏聞。○萬曆三年奏准武職衙門及勳戚等官俱不許僭用四人帷轎與肩輿及擅用交牀上馬。違者聽科道官及巡視衙門參奏重處。指揮以下京衛調外衛外衛調邊衛俱帶俸差操。

凡傘蓋洪武元年令庶民並不得用羅絹涼傘許用油紙雨傘。○三年令京城內一品二品許用傘蓋其餘止許用雨傘。京城外聽用之。○十六年令尙書侍郎左右都御史通政使太常卿應天府國子祭酒翰林等學士許張傘蓋。○二十六年定一品二品銀浮屠頂茶褐羅表紅絹裏三簷三品四品用紅浮屠頂茶褐羅表紅絹裏三簷以上傘蓋俱用黑色茶褐雨傘俱用紅油絹五品用紅浮屠頂青羅表紅絹裏兩簷雨傘同四品六品至九品用紅浮屠頂青絹表紅絹裏兩簷雨傘俱用油紙。○三十五年申明官員傘蓋不許用金繡硃紅妝飾公侯駙馬伯與一品二品同。○成化九年令兩京官員油傘遇兩任用其涼傘京城內不許張設若出郊在外不拘此限。

凡鞍轡洪武元年令庶民不得描金惟用銅鐵妝飾。○二十六年定公侯一品二品用銀減鐵事件靴用描銀三品至五品用銀減鐵事件靴用油畫六品至九品用擺錫鐵事件靴用油畫。○三十五年申明官員人等鞍轡馬領下纓并鞦轡俱用黑色不許紅纓及描金嵌金天青硃紅妝飾軍民用鐵事件黑綠油鞞。



凡帳幔洪武元年令並不許用赭黃龍鳳文職官一品至三品許用金花刺繡紗羅四品五品刺繡紗羅。

六品以下許用素紗羅。庶民用紗絹。○三年令職官一品至五品帳幔許用綾羅紗。被褥用紵絲錦繡。六品至九品帳幔許用紗絹。被褥用綾羅。紬絹。庶民用紬絹布。

凡器皿。洪武二十六年定。公侯一品。二品酒注。酒盞用金。餘用銀。三品至五品酒注用銀。酒盞用金。六品至九品酒注。酒盞用銀。餘皆用髹漆木器。並不許用硃紅。及抹金描金雕琢龍鳳文。庶民酒注用錫。酒盞用銀。餘髹漆。○又令官員牀面屏風。榻子。並用雜色漆飾。不許雕刻龍鳳文。並金飾硃漆。○又令軍官。軍士應用弓矢。止是黑漆。弓袋箭囊。並不許用硃漆描金妝飾。○三十五年申明官民人等。不許僭用金酒爵。其椅卓木器之類。亦不許用硃紅金飾。○正德十六年奏准。職官一品。二品器皿。不許用玉。止許用金。以爲定例。其商賈技藝之家器皿。不許用銀。餘與庶民同。官吏人等。不許僭用金酒爵。其椅卓木器之類。並不許硃紅金飾。

凡寺觀菴院。洪武三年。令除殿宇。梁棟。門窻。神座案卓。許用紅色。其餘僧道自居房舍。並不許起造斗拱。彩畫梁棟。及僭用紅色什物牀榻椅子。○六年。令凡各處僧道寺觀。金彩妝飾神佛龍鳳等像。除舊有外。不許再造。○天順八年。詔京城內外寺觀。今後不許增修請額。

公、侯、及一品、二品許用銀減鐵事件。描銀靴。三品至五品用銀減鐵事件。油畫靴。六品至九品用擺錫事
件。油畫靴。



明會典卷之六十三禮部二十一

【冠禮一】

按冠禮天子止一加用袞冕。太尉設纜。太師受冕。太子皇孫年十二或十五始冠。天子自爲主。擇三公太常爲賓贊。凡三加冠。一祝禮。成化間始定祝詞、醮詞、勅戒詞。其諸王冠祝醮詞皆洪武間定。下及官民莫不有禮。備列于後。

【皇帝冠禮】

洪武三年定

前期太史院奉制筮日。工部製冕服。翰林院撰祝文祝辭。或用古辭。或臨時脩撰。禮部備儀注。中書省承制。命某官攝太師。某官攝太尉。既筮日。遣某官奏告天地宗廟。行一獻禮。訖。告示文武百官於皇城守宿。侵晨具朝服行禮。前一日內使監令陳御冠席於奉天殿正中。設冕服案於御冠席之南。香案又於冕服案南。尚寶卿設寶案於香案之南。侍儀司設太師、太尉起居位於文樓之南。西向。設文官起居位於太師、太尉起居位之後。設武官起居位於武樓之南。設太師、太尉拜位於丹墀內道稍西。北向。東上。設太師、太尉侍立位於殿上御席之西。東向。設盥洗位於丹陛西陛之下。東向。內贊二人位於殿上南楹之左右。東

西相向。設文官拜位於丹墀內道之東。每等異位重行。北面西上。設武官拜位於丹墀內道之西。每等異位重行。北面東上。設使客位於文官拜位之東。北面西上。設殿前班諸執事起居位於武官起居位之北。東向。設侍從班諸執事起居位於文官起居位之北。西向。設宿衛鎮撫二人位於東西陛下。東西相向。護衛百戶二十四人位於宿衛鎮撫之南稍後。東西相向。典牧所官二人位於乘馬之前。東西相向。知班二人位於文武□□□□東西相向。通贊典禮二人位於知班之北。東西相向。通贊在西。贊禮在東。引太師、太尉二人位於太師之北。西立東向。引文武班四人位於文武官拜位之北稍後。東西相向。引殿前班二人位於引武班之南。引使者二人位於引文班之南。設殿前班指揮司官三員侍立位於丹陛上之西。東向。光祿寺官三員位於丹陛上之東。西向。拱衛司官位於殿門之左右。東西相向。文官侍從班起居注、給事中、殿中侍御史、尚寶卿位於殿上之東。西向。武官侍從班懸刀指揮位於殿上之西。東向。護衛、千戶八人位於殿東西門之左右。東西相向。典儀二人位於丹陛上之南。東西相向。鳴鞭四人位於丹陛上北。向。將軍二人位於殿上簾前之左右。將軍六人位於殿門之左右。將軍四人位於丹陛上之四隅。將軍六人位於奉天門之左右。東西相向。是日侵晨。金吾衛陳設甲士於午門外之東西。陳五輅於丹墀之南。北向。典牧所陳仗馬於文武樓之南。東西相向。陳虎豹於奉天門外。東西相向。協律郎陳樂於丹墀文武官之南。鼓初嚴。催班舍人催文武百官具朝服。鼓次嚴。引班引文武官各依品從齊班於午門外以北爲上。

東西相向。通班贊禮。知班典儀。內贊宿衛。鎮撫鳴鞭。殿內將軍。殿外將軍。俱入就位。引班。引殿前班。指揮光祿卿。各依品從。序立於起居位。東西相向。諸侍衛官。俱各服其器服。及尙寶卿侍從官。入詣謹身殿候迎。鼓三嚴。引班。引文武官。以序入。就起居位。引使客。立於文班之後。侍儀版奏外辦。御用監令奏請皇帝服空頂幘。雙童鬢。雙玉導。絳紗袍。御輿以出。侍御導從。警蹕如常儀。皇帝將出。仗動。和聲郎作樂。太常博士引導。至奉天殿。卽御位。樂止。捲簾。鳴鞭。雞唱報時訖。拱御司官。由殿西門出降西階。引班。引入起居位。通班唱各供事。殿前班。侍從班。及諸執事。各就本位。引禮引太師。太尉先入。就拜位。引班。引文武官俱入。就丹墀拜位。知班唱班齊。典儀唱拜贊禮唱。鞠躬。樂作。四拜。興。平身。樂止。引禮引太師先詣盥洗位。西向立。引禮唱搢笏盥手。太師搢笏盥手。引禮唱悅手。司巾以巾進。太師悅巾訖。引禮唱出笏。太師出笏。引禮引太師由西陞陞。引禮退就本位。太師至殿西門內。贊接引至御席西。東向立。引禮復引太尉詣盥洗位。西向立。引禮贊搢笏盥手。太尉搢笏盥手。引禮贊悅手。司巾者以巾進。太尉悅手。引禮贊出笏。太尉出笏。引禮引太尉由西陞陞。引禮退復位。太尉至殿西門內。贊接引入。立於太師之南。侍儀跪奏。請加元服。退復位。太尉進就皇帝席前少右。跪搢笏。脫空頂幘。以授內使。內使跪受幘。興。置於櫛箱。櫛畢。設纜。出笏。興。退立於西。太師進至御前北向立。內使監令就案取冕。立於太師之左。太師祝曰。令月吉日。始加元服。壽考維祺。以介景福。內使監令捧冕。跪授太師。太師搢笏。跪受冕。加冠。加簪纓訖。出笏。興。退立於西。內使監

令徹櫛纒箱。御用監令跪奏請皇帝著袞服。皇帝興著袞服訖。侍儀跪奏請就御座。內贊贊進醴。樂作。太師進就御座前北面立。光祿卿奉酒進授太師。太師搢笏受酒。至御前北面祝曰。甘醴維厚。嘉薦令芳。承天之休。壽考不忘。祝訖。跪受。內使跪受酒。捧進皇帝。皇帝受酒祭少許。啐酒訖。以虛盞授內使。樂止。內使受盞降授太師。太師受盞。興以授光祿卿。光祿卿受盞退。太師出笏退復位。內贊引太師。太尉出殿西門。樂作。降自西階。引禮接引就丹墀拜位立定。樂止。引禮退復位。典儀唱拜贊禮。唱鞠躬。四拜。興平身。樂止。贊禮唱搢笏鞠躬。三舞蹈。贊跪。唱山呼。百官拱手加額曰。萬歲。唱山呼曰。萬歲。唱再山呼曰。萬歲。萬歲。典儀唱出笏俯伏。興樂作。四拜。興平身。樂止。典儀唱禮畢。侍儀奏禮畢。皇帝興。樂作。警蹕。侍從導引入宮。樂止。引禮引太師。太尉。及文武百官以次出。皇帝改服通天冠絳紗袍。入宮拜謁太后。如正旦儀。擇日謁太廟。其儀與時祭同。見廟之明日。百官具公服稱賀畢。賜宴於謹身殿。並如正旦冬至朝會儀。

明會典卷之六十四

禮部二十二

【冠禮二】

【皇太子冠禮】

洪武元年定

前期太史監承制筮日。工部制袞冕。遠遊冠。折上巾服。翰林院撰祝文。祝辭。禮部備儀注。中書省承制。命某官爲賓。某官爲贊。既筮日。遣官奏告天地宗廟。禮部告示文武百官於皇城守宿。至期之前一日。內使監令陳御座。香案於奉天殿中。侍儀司設皇太子次於殿之東房。賓贊次於午門外。皇太子拜位於丹陛上正中。賓贊受制位於皇太子拜位之西北。東向。承制官位於御座之東。西向。宣制官位於皇太子位之東北。西向。賓贊拜位於內道之東。北面。西上。餘陳設如朝會儀。至日清晨。執事官設盥洗於東階東南。壘在洗東。篚在洗西。內使監官設皇太子冠席於殿上東南。西向。醴席於西階上南向。張帷幄於東序內。設褥席於帷中。又張帷於序外。御用監陳服於帷內東領北上。袞服九章。遠遊冠。絳紗袍。折上巾。絳紗袍。緇纒犀簪二物。同箱在服南。櫛實於箱。又在南。司尊實醴於側。尊加勺。幕設醴於席之南。設坫於尊東。置二爵於坫。進饌者實饌設於尊北。諸執事者皆立於其所。冕九旒。遠遊冠。十八梁。折上巾冠。冕各一箱。盛執

事者各執其物立於階之西東面北上鼓初嚴文武百官具朝服次嚴護衛等各就位東宮官導從皇太子至殿門贊禮同太常博士引詣奉天殿東房侍衛官入詣謹身殿奉迎三嚴文武百官入就位皇帝服通天冠絳紗袍御輿以出樂作陞座樂止捲簾鳴鞭報曉訖賓贊就位樂作四拜樂止侍儀司跪承制降自東階詣賓前稍東西向稱有勅賓贊跪侍儀宣制曰皇太子冠命卿等行禮宣訖贊皆四拜文武侍從班俱就殿內位賓贊及應行禮官詣東階下位東宮官太常博士詣殿前東房引皇太子入就冠席樂作皇太子卽席樂止賓贊詣疊洗樂作搢笏盥帨出笏樂止陞自西階執事者捧折上巾進賓降一等受之右執項左執前進皇太子席前北面祝祝辭皆隨時撰述祝畢跪冠樂作與席南北面立贊冠者進席前跪正冠興立於賓後內使跪進服服訖樂止賓揖皇太子復坐賓贊降詣疊洗如前儀贊冠者進跪脫折上巾置於箱興以授內使內使跪受置於席執事者捧遠遊冠進賓降二等受之樂作進冠如前儀贊冠者進跪轡結紘內使進服樂止賓揖皇太子復坐詣疊洗脫冠俱如前儀執事者捧袞冕進賓降三等受之進冠亦如前儀畢太常博士引皇太子下降自東階樂作由西階陞卽醴席南向坐樂止賓詣疊洗樂作盥帨陞自西階樂止贊冠取爵詣司尊前酌醴授賓跪進爵於皇太子席前祝云云祝畢皇太子搢圭跪受爵樂作飲訖奠爵執圭進饌者捧饌設於皇太子席前皇太子搢圭食訖樂止執圭執事官徹爵與饌太常博士引皇太子降自西階殿東房易朝服詣丹墀拜位樂作東宮官各就拜位樂止賓贊詣皇太

子位稍東。西向。賓少進。字之。辭曰。奉勅字某。太常博士啓皇太子再拜。跪聽宣勅畢。復再拜。興進前。跪奏曰。臣不敏。敢不祇奉。奏畢復位。侍立。官並降殿復位。在位官皆四拜。禮畢。皇帝興。樂作。還宮。樂止。內給事導皇太子入內朝。見皇后。如朝正旦儀。百官以次出。明日謁廟。如時享禮。陪祭官先赴廟庭。皇太子服袞冕執圭。太常博士前導。由南門入。至拜位。皇太子及陪祭官皆再拜。興。皇太子陞殿。詣神位前。三上香復位。及陪祭官皆再拜。畢。皇太子還宮。明日百官具朝服詣奉天殿稱賀。退易公服。詣東宮稱賀。賜宴。

成化十四年續定

前期二日。各執事官先於禮部習儀。次日赴文華殿習儀。前期一日。遣官具特性告廟。行一獻禮。錦衣衛設幕。次於文華殿之東序。鴻臚寺設節案於殿內之北。正中設香案於節案之南。設冠席於殿內之東南。向設禮席於西。上南向。內使張帷幄於東序內。設座椅几案。榻褥於幄中。又張帷於序外。陳袍服皮弁服。袞服。圭帶。舄等物。各以箱盛。置於帷中案上。具翼善冠皮弁。九旒冕。各用盤盛。以紅袱覆之。置於東階之南案上。光祿寺設盥洗所於東階冠案之南。稍東。設司尊所於禮席之西南。司尊者實醴於側尊。加勺。幕設於尊東。置二爵於坫。進饌者實饌設於尊北。諸執事者皆立於其所。教坊司設樂。是日早上具皮弁服。御華蓋殿。鴻臚寺奏請陞殿。傳制遣官。文武百官各具朝服侍班。如常儀。制詞曰。朕皇太子某冠命卿等持節行禮。節將至。禮部官詣東序。啓皇太子迎節。樂作。禮部官導皇太子出迎於殿門外。持節官捧節

入置於案。退立於節案之東。樂止。禮部等官導皇太子詣香案前。樂作。行四拜禮畢。樂止。持節官同賓贊并宣勅戒等官序立於東南盥洗之次。禮部官啓皇太子就冠席。樂作。禮部等官導皇太子詣冠席。內侍二人夾侍。皇太子卽席西南向坐。樂止。鴻臚寺鳴贊贊行初加冠禮。樂作。引禮序班。引賓贊皆詣盥洗所。賓贊皆搢笏。以次盥手訖。出笏。樂止。鳴贊二人稍南。東西向立。賓贊官陞自東階相西向立。內侍揭蓋袱。樂作。以盤捧翼善冠陞。賓降階一等受之。樂止。賓右手執冠後。左手執冠前。進皇太子席前北面立。祝曰。吉月令辰。乃加元服。懋敬是承。永介景福。樂作。賓跪進冠。興。復位。贊者跪正冠。興。立於賓後。樂止。禮部官啓易服。皇太子入帷幄。易新袍服出。禮部官啓復坐。鳴贊贊行再加冠禮。樂作。內侍揭蓋袱。以盤捧皮弁陞。賓降階二等受之。樂止。賓右手執皮弁後。左手執皮弁前。進如前儀。祝曰。冠禮申舉。以成令德。敬慎威儀。維民之式。樂作。內侍釋翼善冠。賓跪進皮弁。興。復位。贊者跪正皮弁。興。立於賓後。樂止。禮部官啓易服。皇太子入帷幄。易皮弁服。易出。禮部官啓復坐。鳴贊贊行三加冠禮。樂作。內侍揭蓋袱。以盤捧冕旒。陞。賓降階三等受之。樂止。進如前儀。祝曰。章服咸加。飭敬有虔。永固皇圖。於千萬年。樂作。內侍釋皮弁冠。賓跪進冕旒。興。復位。贊者跪簪結紘。興。立於賓後。樂止。禮部官啓易服。皇太子入帷幄。易袞服出。禮部官啓復坐。鳴贊贊行醮禮。禮部官啓皇太子詣醴席。樂作。禮部等官引皇太子降自東階。由西階陞。卽醴席南向坐。樂止。光祿寺官舉醴卓。樂作。引禮序班。引賓贊詣盥洗所。賓贊搢笏盥手訖。出笏。陞西階。贊者取爵詣